

# Тайынша Маңы

Тайынша аудандық қоғамдық-саяси газеті  
2006 жылдың 3 ақпанынан шыға бастады

№ 15 (982) 5 сәуір 2024 жыл

facebook.com/tainsha.tany



http://tainshatany.kz



tainsha\_tan@list.ru

\* АҚОРДА

## СУ ТАСҚЫНЫН КӨРГЕНДЕ, КӨКТЕН ТҮСКЕНДЕЙ АБДЫРАП ҚАЛДЫҢЫЗДАР – ПРЕЗИДЕНТ

Президент су басқан аймақтарда әлеуметтік маңызы бар қызметтер мен азық-түлік бағасының өсуіне жол бермеу мәселесіне Үкімет назарын аударды, деп жазады Egemen.kz.

«Су тасқыны мен өртке қатысты жағдай жыл сайын қайталанады. Жауапты органдар мен салалық қызметтердің (Қазсушар, Қазгидромет) жобалау, сараптама жасау жұмыстары нашар ұйымдастырылған. Тиісті шаралар, негізінен, жағдай орын алғаннан кейін немесе толыққанды болжам жасалмай қабылданады. Сондықтан бізге дағдарыс жағдайларын болжаудың нақты тетігі өте қажет. Цифрлық даму министрлігі Экология, Су ресурстары және Төтенше жағдайлар министрліктерімен бірлесіп жыл соңына дейін барлық ықтимал төтенше жағдайларды (су тасқыны, өрт және т.б.) модельдеуге, тиісті болжамдар, ұсынымдар мен іс-қимыл жоспарын жасауға мүмкіндік беретін ақпараттық жүйе әзірлеуге тиіс.

Айтпақшы, Үкімет пен жергілікті атқарушы органдар, ең алдымен, облыстардың әкімдері жазғы маусымға да дайын болуы қажет. Өрт немесе басқа да табиғи апаттардың болуы әбден мүмкін. Қазіргідей қамсыз отырмай, алдын ала әрекет ету керек. Су тасқынын көргенде, көктен түскендей абдырап қалдыңыздар. Осы ретте еліміздің шығыс өңірлеріндегі су тасқынын модельдеу жөніндегі ТЖМ мен «Қазақстан Ғарыш Сапары» ұлттық компаниясының бірлескен жұмыс тәжірибесін қолдануға болады», деді Қасым-Жомарт Тоқаев.

Президент қарғын суды ауыл шаруашылығы қажетіне жарату үшін жоспар әзірлеу және пәрменді шаралар қабылдауды тапсырды. Қ.Тоқаев әкімдіктерге еріген қар суын елді мекендерден өзен арналарына немесе тоғандарға бұру жұмыстарын жүргізуді тапсырды.

Дана МЫРЗАҚАДІР, Egemen.kz.



### ЖАҒДАЙ ӘЛІ ДЕ КҮРДЕЛІ

Еліміздің батыс өңірінде су деңгейі шамалы төмендегенімен, елдің орталық, солтүстік және шығыс бөлігінде өзен сулары көтеріліп жатқаны байқалады. Әзірге бес облыста су басу қаупі бар. Жергілікті ауқымдағы 20 төтенше жағдай жарияланды. Ал Ақтөбе, Қостанай, Батыс Қазақстан облыстарында жағдай әлі де күрделі.

«Ақтөбе, Қостанай, Атырау, Ақмола, Қарағанды облыстарында 55 жеке тұрғын үй және 8 аула аумағы су астында қалған (су тасқыны басталғаннан бері 1 376 үй және 1 319 аула аумағы). 28 үй мен 39 аула аумағынан еріген қар суы сорғызылды (су тасқыны басталғаннан бері 358 үй мен 988 аула аумағынан су сорғызылды). 1 345 адам, оның ішінде 496 бала құтқарылды (су тасқыны басталғаннан бері 17 131 адам, оның ішінде 6 683 бала). Қазірге дейін 5,7 млн текше метрден аса еріген қар суы сорғызылған. Кейінгі деректер бойынша тез еріген қар суы Ақмола облысы Жарқайың ауданының Пригородное аулындағы 8 жеке тұрғын үйді басып қалған. 19 адам, оның ішінде 2 бала және 1 жүкті әйел құтқарылып, тұрғындар туыстарының үйлерін уақытша паналай тұруға мәжбүр. Сондай-ақ ауыл тұрғындарының 34 бас малы қауіпсіз жерлерге жеткізілді. «Республикалық, облыстық және жергілікті маңызы бар 18 автожолды су шайды. Су шайған 77 автожол, оның ішінде 4 көпір және 73 жол төсемі, су жүрген 93 автожол бақылауда. Жергілікті атқарушы органдар халықпен байланыс орнатып, қажетті азық-түлік және дәрі-дәрмек қорларын құрған, 67 елді мекен көлік қатынасынсыз қалды», - дейді Д.Ғалымжан. Ақтөбе облысында «Тереңсай» бөгетінің суы арнасынан асып, Әйтеке би ауданының Әйке аулындағы 2 жеке тұрғын үйді су басқан. Әйке аулынан Жүргенев аулына 297 адам, оның ішінде 79 бала эвакуацияланды. Ал Ойыл ауданының 5 елді мекеніндегі жеке үйлерді су басуына байланысты Қорғаныс министрлігі әуе кемелері арқылы 85 адам, оның ішінде 27 бала құтқарылған.

### ОБЛЫС ӘКІМІ ТАЙЫНША АУДАНЫНДА

Солтүстік Қазақстан облысының әкімі Ғауез Нұрмұхамбетов Тайынша ауданына келіп, аудан орталығында, сондай-ақ Теңдік, Донецк және Летовочный ауылдарында су тасқынына қарсы іс-шаралардың барысын тексерді.

Тасқын сумен күресу үшін қапшықтар мен инертті материалдарды дайындау жұмыстары жүргізіліп жатыр. Ғ.Нұрмұхамбетов құтқарушылармен және еріктілермен кездесіп, оларға жауапты кезеңдегі қажырлы еңбектері үшін алғыс айтып, аудан орталығы мен ауылдық округтердің тұрғындарымен сөйлесті.

— **Әрбір ауыл әкімі елді мекендерден еріген қар суын бұру жұмыстарын жүргізуі тиіс. Егер су аулаларға кіріп, мүлікке зиян келтірсе, біз бұл мәселені де шешеміз. Тиісті қаражат қарастырылған. Аудан деңгейінде комиссия құрылсын. Егер су басу жағдайлары туындап жатса, залалды есептейтін боламыз,** - деді Ғ. Нұрмұхамбетов Тайынша ауданының әкімі Берік Әлжановқа.

- **Қазір Департамент жергілікті атқарушы органдармен бірлесіп бірқатар алдын алу шараларын жүргізіп жатыр. Облыста 87 елді мекен су тасқынына бейім. Яғни, су тасқыны еріген сулардан және су қоймаларындағы су деңгейінің көтерілуінен орын алуы мүмкін. Тәулік бойы мониторинг жүргізіліп жатыр** - деді Төтенше жағдайлар департаменті бастығының орынбасары Мұрат Қанғожинов.

Әлбетте, жағдай өте күрделі болғанымен, аудандағы уәкілетті қызметтердің жіті бақылауында. Қауіпсіздік мақсатында халық арасында түсіндіру жұмыстары жүргізіліп жатыр. Мәселен, үлкен көлемде су келсе, өздерін қалай ұстау керек деген сұрақтарға жауаптар қайтарылуда. Бүгінде екі эвакуациялық қабылдау пункті жасақталған: №5 ОМ және Тайынша қ. Агробизнес колледжі. Аудандық шұғыл әрекет ету қызметтері күндізгі және түнгі уақытта жұмыс істейді, оларға қоғам белсенділері, еріктілер, бей-жай қарамайтын аудан тұрғындары қосылуда.

Су тасқынына қарсы күреске белсенді қатысқан азаматтарға алғыс айтамыз. Су тасқынынан тұрғындар мен елді-мекендерді аман сақтап қаламыз, бұған күмәндандудың қажеті жоқ. Осы мақсатта барлық күш-жігер жұмсалатын болады.



### ҚҰРМЕТТІ ТАЙЫНШАЛЫҚТАР, ҚЫМБАТТЫ ДОСТАР!

Біздің ауданға үлкен судың келуіне бәріміз куә болдық. Барлық жерде Төтенше жағдайлар қызметкерлерінің күштерімен су тасқынына қарсы іс-шаралар жүргізілуде. Күндіз де, түнде де құтқарушылар белбеуімен мұзды суда тұрып, тұрғын үйлерді су басудан және олардың тұрғындарына зиян келтірмеу үшін қолдан келгенін бәрін жасап жатыр. Тайынша ауданының барлық тұрғындарының атынан Сіздердің еңбектеріңіз үшін рахмет! Осы қиын кезеңде аудан орталығында да, ауылдық округтерде де біздің жанашыр азаматтарымыздың белсенділігіне ризашылығымды білдіргім келеді, олар құтқарушылармен бірге инертті материалмен қаптар дайындады, үйінділерді нығайтты, су өткізу құбырларын тазартты. Бұл жоғары жауапкершіліктің, азаматтықтың және өз Отанына деген сүйіспеншіліктің белгісі деп білеміз. Жалпы осы төтенше жағдай кезіндегі жұмсаған күш – жігерлеріңіз бен алтын уақыттарыңыз үшін алғысымыз шексіз! Сіздердің ынтымақ – бірліктіңіздің, достық қолдауларыңыз қиындықтарды жеңуге және су тасқыны кезінде көмектескендеріңіз – ол әрқайсымыздың азаматтық парызымыз деп білейік. Су, азық – түлік, ыстық шай жеткізуді ұйымдастырған кәсіпкерлерімізге, еріктілерімізге де мың алғыс!

Ауданымызға Солтүстік Қазақстан облысының әкімі Ғауез Нұрмұхамбетов келді. Өңір басшысы су тасқынына қарсы іс-шаралардың барысын тексерді, жергілікті жерлердегі жағдайды бағалады, тұрғындармен, төтенше жағдай қызметкерлермен, Түркістан облысынан бізге келген құтқарушылармен сөйлесіп, атқарып жатқан ерен еңбектің барысын көрді. Облыс әкімі барлық қызметтердің үйлесімді жұмысын, жергілікті халықтың табиғат апатына қарсы күрестегі бірлігін атап өтті. Облыс әкімі төтенше жағдай кезінде, асқан жауапкершіліктің қажет екенін ерекше атап айтты. Сонымен қатар, су әлі де келе жатқанын атап өтті.

Тайыншалықтар, Жерлестер, сіздер бүгінгі таңда, яғни күнделікті не болғанын фейсбук парақшаларынан көріп, байқап отырсыздар. Біздің қоғамдастық нақты көмекке мұқтаж болған осындай сәттерде, су тасқыны мен дағдарыс уақыттарында бақылап емес, керісінше бірлесіп және белсенді қолдау көрсетіп, алғы шепте сумен арпалысып жүрген азаматтарға қосылуға шақырамын. Қаптарды құммен толтыруға көмектесіңіз, көмекке мұқтаж адамдарға қолдау көрсетіңіз, әркім өз үлесін қоса алатындығы туралы ақпарат таратыңыздар. Мұндай қиын кезеңдер адамзаттың шынайы құндылықтарын көрсетеді. Сырттан емес, бірге әрекет ету арқылы қоғамымызды, кінәсіз қала мен ауыл тұрғындарын апаттан арашалап, көмек қолын созайық. Сөздерімізді іс-әрекетке айналдырып, не істей алатынымызды көрсетейік. Баршаңызды қиын кезеңде бір ортада болып, халықтың игілігі мен қоғамдағы ортақ тыныштық үшін әрекет етуге шақырамын.

Сәрсенбай БЕКШЕНОВ,  
Тайынша ауданы мәслихатының төрағасы.

Бақытбек ҚАДЫР,  
журналист «Егемен Қазақстан» газетінен.

Гүл ЖАМАШҚЫЗЫ, Тайынша маңы









# ЕЛІНІҢ БОЛАШАҒЫ – «ЕЛІМ» ДЕГЕН АЗАМАТЫНА БАЙЛАНЫСТЫ



Суретте: Орынбай қажы Әлжан тегі-ауылшаруашылығы саласының ардагері, ауданның Құрметті азаматы және 2018-2020 жылдардағы аудан әкімі И. И. Түрков.

Теңдік ауылы Тайынша ауданының орталығынан 25 шақырым қашықтықта орналасқан. Ауылдық округтің орталығы. Мемлекеттік тілде білім-тәрбие беретін орта мектебі бар. Теңдік ауылы қоныс тепкен жерді жергілікті көнекөз қариялар Қаратомар деп атаған. Ауыл-селоны жаңғырту мәселесі тек өндірістік-экономикалық қана емес, әлеуметтік-саяси мәні зор мәселе, оны шешуді барлық ауылдық әкімдіктер мен серіктестіктердің, шаруа қожалықтары басшыларының, ең негізгісі – «Елім» деген ел азаматтарының бірлесіп көтерер жүгі деп білеміз. Ауылы үшін маңдай терін төгіп, елінің күннен-күнге көркейіп, алға басуына айрықша мән беріп отырған азаматтарымыз, құдайға шүкір, баршылық. Солардың қатарында – «Менмендікті жеңген – инабатты, ашуын жеңген – ақжарқын, құлқынын жеңген – бақытты болады», - деген анасының даналық сөзінен сусындап өскен, қадірлі азамат ретінде қалыптасқан, абзал жан, үлкен әулеттің тірегі, отбасында ардақты әке, ақылшы ата – Орынбай Шайханұлы Әлжанов болғаны – шындық! Ал бүгінгі таңда абыз ата ортамызда жоқ, сол бір бақытты күндер, талай жүрген жолдар, айнымас дос, атқарған қызмет, барлық ой-армандар мен еңбек жолында шыққан талай биік белестері, отбасылық қызық-қуанышты сәттер бәрі-бәрі артта қалды. Мұның бар сыры мен шындығы - осыдан 40 күн бұрын осынау сыйлы азамат өмірден өтті. Өзі өмірден өтсе де артында оның сабырлы мінезі, қонақжайлылығы, адамгершілігі мен қайырымдылығы көптеген адамдардың мәңгілікке есінде қалды. Өзі өмірден өтсе де, өшпес сөздері, бата-тілектері, ең бастысы артында ізі, өмірін жалғастырар ұрпағы қалды. Бүгінде Беркінбай, Ақылбай, Шоқан мен Ақан әке жолын қуған нағыз ауыл шаруашылық мамандары. Ал, немерелері болса аталарының кезіндегі көз қуанышы, болашақтағы ата үмітін ақтар басқан ізі.

– «Немерелерім жұрттың ала жібін аттамайтын, елдің игілігі үшін еңбек ететін азаматтар болып өссе екен деп тілеймін», - дейді әулеттің отанасы, ақылшы әже-Бақыт Сұлтанқызы.

Орынбай Шайханұлы 2004 жылы Мекке-Мәдинаға алғаш барып, одан кейін де үш рет барып қайтты.

Ауылында имандылықты, салауатты өмір салтын насихаттаудан бір жалыққан емес. Осының дәлелі болса керек, ауыл дүкенінде ащы су сатылмайды. Қажы ағамыздың ой-өрісінің кеңдігі, көрегендігі мен көп оқығандығынан болар, үйде кітаптардың ұзын саны бес жарым мыңдай болған. Бір жарым мың әдеби кітапты ауылдың мектебіне сыйға тартты. Серіктестік кеңсесінде де әр түрлі кітаптар бар.

Ауылының шаруашылығын өрге өрлетіп, тұрғындардың көңілін тауып отырған азамат, ауылдың сыйлы ақсақалы – Орынбай Әлжанов болды..... Өзінің ақыл-ой парасатының молдығы, кез-келген адаммен тіл табыса алатындығы, мүлт жібермес әділдігі, сөзге тұрақтылығы, уәдеге берік, таймас табандылығы, шаруашылық жөнінен жетік білетіндігінің арқасында ел құрметіне бөленіп отырды. Елінің көркеюі – ел тілегін ақтаған азаматына байланысты болса керек. Жас кезінде, мүмкін, елінің дуалы ауыз ақсақалдарынан: «Халқыңа жасаған жақсылығың алдыңнан шықсын», - деп бата алып, сол баталар қабыл болып жауып тұрған болар.... Асқар тау Әкені, ақылшы Атаны ендігі кезеңде ұрпағы сағына еске ала отырып, топырағың торқа, жаның Жәннатта нұрлансын деп Алладан тілейді, Құран бағыштайды.

Түйін. Тұяқсызды тұлпар қып, қанатсызды сұңқар ғып, ұяты барды ұлтан ғып, елінің қамқоршысы болып, ортамызда жүрген ардақтыларымызды құрметтеу арқылы тәуелсіз еліміздің ертеңін жарқын етуге, дүйім еліміздің рухын бекемдеуге ұмтылыс үстінде Шайханұлы Орынбай қажы атамыз тектес ел азаматтарына қарап ой түзеуге, болмыс-бітімдіміз бен мінез-пиғылымызды сапалық деңгейге көтеруге болады десек, ол – шындық. Бұл - «Болар елдің баласы бірін-бірі батыр дейді», - деген сыңаржақ эгоистік пиғылдан да биік тұрған текті түсінік, ұлықты ұғым. Осы ағаларымызға еліктеп, тура сондай болмасақ та, ұқсап бағайық, ағайын! Әке, ата асқар тауың орманың, әке деген жұбанышың қорғаның, О, адамдар бар кезінде әкені, Қадірлейік, өкініп бір күн қалмайық!

 Гүл ЖАМАШҚЫЗЫ, «Тайынша таңы»

«Ағамыз Орынбай Шаймұхамбетұлы Әлжан Тайынша ауданы Теңдік елінде өмір кешіп, қажылыққа үш рет барған, соңғы сапарында Ирусалимдегі «Әл-Ақса» мешітінде болып, Сүлеймен Пайғамбар мешітінің қарсы алдындағы аспалы тастың астында намаз оқыған. Ағамыздың елге деген еңбегін екі ауыз сөзбен жеткізу мүмкін емес», - деп ақын ағамыз Тыныштық Шаменов мына өлең жолдарын кезінде, көзі тірісінде жазып кеткен еді...Бүгінгі күні оқырмандар назарына осы өлең жолдарын Қажы атамызды еске алу мақсатында жариялап отырмыз:

Бұл өмір десек тағы тегі жалған, Адамда таусылмайды, бітпейді арман.

Жасыңнан оқу оқып, білім алып, Өмірің елің үшін бағытталған.

Ойланып жеке шаруашылық құрған едің, Кеш жатып, ерте азаннан тұрған едің.

Ел үшін мал өсіріп, егін салып, Халықты дін жолына бұрған едің.

Зәулім, әсем мешіт салдың халыққа, Көз жеткізіп, Алла барын аныққа.

Тыныштық ШАМЕНОВ, ақын, мәдениет қайраткері.  
2013 жыл, 11 қаңтар.

## «ТАЙЫНША АУДАНЫНЫҢ ҚҰРМЕТТІ АЗАМАТЫ» ОРЫНБАЙ ШАЙХАНҰЛЫ ӨМІРДЕН ОЗДЫ...

Тайынша ауданының халқы ардақты азаматымен қоштасты. Екі мәрте «Еңбек қызыл Ту» ордені «Құрмет» ордені, «Еңбектегі ерлігі үшін», «Ерен еңбегі үшін» медалінің иегері, «Тайынша ауданының Құрметті азаматы», өнегелі өмір иесі, абыз қария - Әлжан Орынбай Шайханұлы бақилық сапарға аттанды.

Орынбай Шайханұлы 1938 жылы дүниеге келді. 1956 жылы орта мектепті аяқтағаннан кейін, еңбек жолын Ортақ ауылында бастаған. Целиноград ауылшаруашылығы институтының түлегі бар саналы ғұмырын ауылшаруашылығы саласына арнады. 1965 жылы бөлімше агрономы, 1968 жылы бөлімше меңгерушісі, 1973 жылдан «Тернов» кеңшарының бас агрономы, 1976 жылдың мамырайынан Красноармеец аудандық мал бордақылау шаруашылығының директоры болып тағайындалды. 1998 жылы «Қаратомар» жауапкершілігі шектеулі серіктестігін құрды. Еңбек жолында мемлекет тарапынан талай марапаттарға ие болған еңбек ардагері жастар тәрбиесіне де асқан жауапкершілікпен қарады. Әсіресе, ауылдағы жас жеткіншектерге үнемі ақылын

айтып, олардың діни сауаттылықтарын арттыруға да зор үлес қосты. Өзі өмірінің соңғы күніне дейін өмір сүрген Теңдік ауылында зәулім мешіт тұрғызды.

Тағылымды тағдыр иесі ауылдағы ардагерлер кеңесінің төңірегінде бекем бірлік пен тату тірлікті қамтамасыз етті, аға буын өкілдеріне құрмет көрсету, жастарға дұрыс тәлім-тәрбие мен бағыт-бағдар беру бағытындағы жұмыстардың барлығының басы-қасынан табылып, жергілікті атқарушы билікке де көп қолдау көрсетті. Өмірлік мол тәжірибесі, ағалық ақыл-кеңесі жергілікті әкімдіктердің жұмысының алға жылжуына тікелей әсер етті десек, ол – шындық. Құрметті қария өзінің ақыл-парасатымен, білімімен, қайраткерлік қарым-қабілетімен абырой биігіне көтерілді. Жұртшылыққа ақ батасын арнап, қадірлі қария, ақылшы аға атанды.

Сөз бастаса шешен, іс бастаса көсем, өмір жолы өнегеге толы тұлға ел Тәуелсіздік алғаннан кейінгі жылдары Тайынша ауданы өңірінің, оның ішінде Теңдік ауылының өсіп-өркендеуіне айрықша үлес қосты. Ғұмыры ғибаратқа толы Орынбай Шайханұлының жүріп өткен жолы, атқарған қызметтері, қажырлы

еңбектері, өмірлік ұстанымдары, тіпті сөз саптауына дейін тұнып тұрған ғанибет, шежіре еді. Есімі Тайынша жұртшылығына белгілі ақсақал қайраткер-тұлға, ел ағасы, абыз ақсақал атанды.

Артына өшпес із қалдырған Әлжан Орынбай Шайханұлының жатқан жері жайлы, топырағы торқа болсын. Отбасы, ағайын-туыстарының, ұрпақтарының орны толмас қайғыларына ортақтасып, көңіл айтамыз. Орынбай Шайханұлының асыл бейнесі, елі үшін атқарған еңбегі мәңгілікке есімізде қалады.

Аудан әкімі Б.А.Әлжанов, аудан әкімінің орынбасарлары Е.Е.Дюсембин, Г.Қ.Бәтенова, А.Сабуров, аудан әкімі аппаратының басшысы Б.Б.Абулғазина, Тайынша ауданы мәслихатының төрағасы С.М.Бекшенов, Тайынша қаласының әкімі В.А.Шпаковский, Тайынша аудандық мешітінің Бас имамы Зиятбек Ахметұлы, аудандық білім бөлімі басшысының м.а. Г.Карменова, «AMANAT» партиясы Тайынша аудандық филиалының төрағасы М.Ж.Хамзин, «Тайынша таңы» газетінің тілшісі Сәлік Жұматтегі, «Тайынша таңы» газетінің Бас редакторы Г.Ж.Нұралина.

## ТАЙЫНША ЖӘРМЕҢКЕСІ

Тайынша ауданы біздің облыстың қарқынды дамып келе жатқан аудандарының бірі. Өзінің тарихы, табиғаты, халқымен бай өңір десек, қателеспейміз. Әр ауылдың, әрбір отбасының өзіндік тарихы бар. Әр елдің, жердің, өзен-сулардың халық қалап қойған атауы болады. Солардың бірі – біздің ауданымыздың атауы Тайынша. «Бұл қашан, қайдан, қалай пайда болған атау», – деген сұрақтар тағы бар. Осы өңірде Тайынша жәрмеңкесінің ашылғанына 2022 жылы -159 жыл болады. Олай болса, туған өлке тарихына кішігірім саяхат жасап, туған өлке тарихынан өзіміздің білуіміз бойынша бір үзік сыр шертуді жөн көрдім.

**Балуан Шолақ:** «Бұл күнде қырық тоғызда менің жасым, Қамалдың бұзып жүрмін тау мен тасын. Кешегі сентябрьдің базарында, Көтердім 51 пұт гірдің тасын»... деген өлең жолдары тарих бетінде бар дүние екенін білеміз.....

«Біздің аудан орталығынан солтүстік шығысқа қарай 60 шақырымдай жерде, қазіргі Киров селосының жанында шағын көл бар, ол көл Тайынша (яғни, ірі қараның төлі - тана) деп аталады. Ал, жергілікті шаруашылықтың №4 бөлімшесі орналасқан жерде екінші шағын көл – Сеңдікөл бар. Екі көлдің арасы 4-5 шақырым. XIX ғасырдың орта шенінде 1863 жылдары Қызылжардың Ганьшин атты I гильдиялы купесінің таңдауы дәл осы екі көлдің аралығында тоқтап, жәрмеңке (ярмарка) ашылған. Жәрмеңке жылына 2 рет 25 сәуірден 25 мамырға дейін (көктемгі) және 1 қыркүйектен 1 қазанға дейін (күзгі) өткізіліп тұрған. Жәрмеңкенің өткізілетін мерзімі халықтың қажеттіліктері мен тұтыну мөлшеріне байланысты болған. Көршілес Ресейдің – Нижний Новгород, Самара, Ірбіт жәрмеңкелерінен келетін саудагерлер қазақ даласына қажетті өндіріс тауарларын жергілікті халықтың мал шаруашылығы өнімдеріне, малдарына айырбастаған. Кейде жергілікті халық тауарды бір базардан екіншісіне дейін қарызға да алады екен. Ең қызығы, осынау алыс-берістің көбі саудагер мен алушының арасында ешбір құжатсыз, сөз жүзінде жүзеге асырылған. Қол алысып, орысша айтқанда «слово купца» - сөз беру белгілі бір шартты мерзімде орындалып отырған. Әрине, ата-бабаларымыз сөздің қадір-қасиетін білген ғой. Ұйымдастырылған жәрмеңкеге жиналған жұртшылық сауда-саттықпен шектеліп қана қоймай, ең үлкендері мен билер алқасы ел мен жер дауын, барымта, ұрлық-қорлыққа қатысты мәселелерді шешетін болған, балуандар күресі, айтыстар ұйымдастырылып, ақындар мен әнші-күйшілер өнер көрсеткен. Тайынша базары бірте-бірте асқан дарын иелері жиналатын өнер ордасына айналады. Мәселен, Орынбай, Шөже, Арыстанбай, Біржан сал, Ақан сері, Тезекбай сынды қазақтың жүйрік әлі майталман ақын-жыршылары өз өнерлеріне дүйім жұртшылықты тәнті еткен. «Сентябрь базарының» бір тұсында ақындар айтысып жатса, енді бірінде әсем ән мен қоңыр күй әуендері адамның жан-дүниесін тебіренгізіп, өзіне баурап жатады. Балуан Шолақ сол заманның ірі балуаны ғана емес, сонымен қатар цирк өнерінен де хабары болған. Мысалы, шауып келе жатқан жүйрік аттың біресе оң жағына, біресе сол жағына түсіп мінсе, кейде аттың үстінде тік тұрып та шабатын. Тұла бойындағы күш-қуатын басқа да амал-тәсілдерімен көрсете білген. Осынау танымал жәрмеңкенің дәл біздің өңірімізде орналастырылуының өзінде бір мән бар шығар?! Әрине, туған өлкеміздің суы таза, оты шүйгін, табиғаты жан-жануарға жайлы. Оған қоса, көршілес Ресеймен шекаралас. Кезінде қызылжарлық Ганьшин мырзаның жәрмеңкеге арнап дәл осы өңірді таңдауында да осынау қолайлы жағдайлар ескерілген болуы керек. 1927 жылдары Кеңес үкіметі тұсында Тайынша жәрмеңкесі жабылып қалды. Соңғы рет жиналған базарды жергілікті белсенділер мен ОГПУ-дің өкілдері күшпен таратып жіберді. Себебі, 1928 жылы баршаны конфискации науқаны күтіп тұрды, байлардың мал-мүліктері тәркіленіп, Ф.И. Голощекин бастаған Қазақстан өлкелік партия комитетінің жер аудару туралы жасырын қаулысы шыққан болатын. РСФСР Халық Комиссарлары Кеңесінің 1920 жылғы 5 тамыздағы Қаулысымен 1921-1922 жылдары Петропавл-Көкшетау теміржолы салынды. Құрылыс жұмыстарына солтүстікқазақстандық азаматтармен қатар, орталық Ресейден, Оралдан, Сібірден келген құрылысшылар да жұмылдырылды. Ұзындығы 133 шақырым теміржолды 1922 жылы маусым айының бас кезінде бітірді. Ал, біздің стансаға Тайынша жәрмеңкесінің атауы берілді»

Бүгінде қаланың, ауданымыздың «Тайынша» аталуы осыдан өз бастауын алады. Еліміздің әлеуметтік-экономикалық дамуында зор үлес қосып келе жатқан Тайынша ауданының болашағы зор деген үміттеміз. Тайыншаның топырағы киелі, тынысы кең, жомарт жандардың, білімділер мен өнерлі азаматтардың, көп ұлттың бас қосқан құтты мекені.

**Орынбай қажы ӘЛЖАН,**  
Тайынша ауданының Құрметті азаматы.  
2022 жыл 2 мамыр.

## САҒЫНЫШПЕН ЕСКЕ АЛАМЫЗ



Ардақты әкеміз, ақылшы атамыз – Орынбай Шайханұлы осыдан 40 күн бұрын өмірден озды. Әкемізбен, атамызбен өткен балалық шақ, бірге жүрген күндер, ойнап-күлген отбасылық талай қызық-қуаныштарымыз, өкінішпен артта қалды. Әкеміздің қоңыр үні, сабырлы мінезі, ақыл-кеңестері, жарқын бейнесі әрқашан жаңғырып санамызға нұр себері сөзсіз. Әкемізді, немерелері үшін ақылшы атамызды сағына еске ала отырып, топырағың торқа, жанның жәннатта нұрлансын деп Алладан тілейміз, Құран бағыштаймыз.

Әке өзің жайлы айта алмаймыз тауысып,  
Ел айтады, жұрт айтады жарысып.  
Көпшіліктен алған алғыс, сауабың,  
Жатқан шығар, рухыңменен қауышып.

Ақылшы ата көзден кеттіңіз мәңгі жырақтап,  
Сенбей сізді көп іздедік

жан-жағымызға қарайлап.  
Жаңа білдік, кетіпсіз ғой бұл өмірден мәңгіге,  
О дүниені мекен қылып мәңгілікке тұрақтап.

Адам мәңгі жүрмейді екен бұл жалғанда,  
Көнеміз ғой тағдырдың біз салғанына.  
Көздеріне еріксіз ыстық жас келеді,  
Немерелер өзіңді сағынып, еске алғанда!

Бәйтеректей әулетке сая болған,  
Бәрінен де мейірімін аямаған.  
Жәннатта жаның болсын, рухың биік,  
Өзіңдей қайда бізге ардақты адам.

Жалғап өскен ағайынның арасын,  
Қайран Әке, сен бір төбе дарасың.  
Тірі болса артыңдағы ұрпағың,  
Әке – ата сіз мәңгі есте қаласыз!

Мейіріммен жымиған күлкіңізді,  
Еске алып, мәңгілікке сағынамыз.  
Жатқан жерің, жаныңызға жайлы болып,  
Сәуле шашып тұрсыншы қабіріңде.

**Еске алушылар: Әлжановтар әулетінің ұл-қыздары, немере-жиендері мен шөберелері атынан - ұлы Беркінбай.**

## Тамаққа қосатын биологиялық белсенді қоспалар туралы не білуіңіз керек?

Тамаққа қосатын биологиялық белсенді қоспалар (БАД) – табиғи және (немесе) табиғи биологиялық белсенді заттар, сондай-ақ тамақпен бір мезгілде тұтынуға немесе тамақ өнімдерінің құрамына енгізуге арналған пробиотикалық микроорганизмдер. БАД мамандандырылған тамақ өнімдеріне жатады (яғни олар дәрі емес) және мемлекеттік тіркеуге жатады. Өнімнің қауіпсіздігін растайтын құжат мемлекеттік тіркеу туралы куәлік болып табылады. Мемлекеттік тіркеу туралы куәліктің болуын Еуразиялық экономикалық комиссияның ресми сайтында мемлекеттік тіркеу туралы куәліктердің бірыңғай тізілімінде тексеруге болады (<https://eec.eaeunion.org>).

БАД жарнамалау міндетті түрде келесі ақпаратты қамтуы керек: саудалық атауы; құрамына кіретін белсенді компоненттер туралы мәліметтер; қолданудың негізгі көрсеткіштері; қолдану тәсілі мен дозалары; негізгі жанама әсерлері мен қарсы көрсеткіштері; балаларға, жүкті әйелдерге, сондай-ақ ана сүтімен емізу кезеңіне қатысты ерекше нұсқаулар; сату шарттары; қолдануға көрнекі және түсінікті ұсыныстар; Қазақстан Республикасында шағымдарды қабылдауға өндіруші уәкілеттік берген тұлғаның атауы, мекенжайы; мемлекеттік тіркеу туралы куәліктің нөмірі, берілген күні болу керек. Теледидар мен радиоға, интернет-ресурстарға арналған жарнамада мынадай ақпарат болуы

тиіс: саудалық атауы, негізгі қарсы көрсеткіштер, балаларға, жүкті әйелдерге қатысты, сондай-ақ ана сүтімен емізу кезеңінде ерекше нұсқаулар, қолдануға көрнекі және түсінікті ұсыныстар және міндетті түрде мемлекеттік тіркеу туралы куәліктің нөмірі, берілген күні болу керек. Әр жағдайда жарнама келесі ескертулермен бірге аталған объект дәрі ретінде саналмайтыны туралы ескертумен жүреді. БАД сату кәсіпкерлік субъектінде мемлекеттік тіркеу туралы куәлік міндетті түрде болған кезде жүзеге асырылуға тиіс. «Әкімшілік құқық бұзушылық туралы» Қазақстан Республикасының Кодексында халықтың санитариялық-эпидемиологиялық саламаттылығы саласындағы заңнаманың, сондай-ақ техникалық регламенттердің талаптарын бұзғаны үшін әкімшілік жауапкершілік көзделген.

Құрметті тұтынушылар! Қазіргі уақытта бұқаралық ақпарат құралдарында, соның ішінде әлеуметтік желілер арқылы биологиялық белсенді қоспалар үлкен ассортиментін жарнамалайды және сатады. Осыған байланысты Сізге, өнімді таңдаған кезде мұқият болуды ұсынамыз. Сатушыдан биологиялық белсенді қоспалардың мемлекеттік тіркеу туралы куәлігін талап етіңіз.

**«Тайынша аудандық санитариялық-эпидемиологиялық бақылау басқармасы» РММ басшысының м.а.**

